

SIARAN AKHBAR

PERUNTUKAN RM12 JUTA MANFAATKAN LEBIH 800 USAHAWAN BELIA DI BAWAH PROGRAM TUBE-X



YB Datuk Ewon Benedick, Menteri Pembangunan Usahawan dan Koperasi bersama peserta TUBE-X iaitu penerima Anugerah Rancangan Perniagaan Terbaik dan Peserta Terbaik dari Zon Utara, Zon Pantai Timur dan Zon Tengah / Selatan. Turut kelihatan adalah YBhg. Dato' Sri Suriani binti Dato' Ahmad, Ketua Setiausaha KUSKOP dan YBhg. Tan Sri Datuk Seri Panglima Bernard Giluk Dompok, Pengerusi SME Corp. Malaysia

KUALA LUMPUR, 11 Jun 2024 – Seramai 805 usahawan belia Bumiputera telah berjaya dilatih di bawah Program Tunas Usahawan Belia Bumiputera (TUBE) pada tahun ini yang melibatkan peruntukan berjumlah RM12 juta. Program yang dijenamakan sebagai TUBE-X bersempena tahun ke-10 penganjurannya tahun ini dilaksanakan oleh SME Corp. Malaysia, agensi di bawah Kementerian Pembangunan Usahawan dan Koperasi (KUSKOP). Seramai 150 peserta Zon Utara, Zon Pantai Timur dan Zon Tengah / Selatan telah diraikan semasa Sesi Temu Mesra (*Meet & Greet*) TUBE-X hari ini yang telah disempurnakan oleh YB Datuk Ewon Benedick, Menteri Pembangunan Usahawan dan Koperasi.

Program yang turut dilaksanakan di Sabah dan Sarawak pada bulan Mei yang lalu menawarkan Geran Permulaan Perniagaan sehingga RM15,000.00 kepada setiap peserta. Program berbentuk latihan asas keusahawanan ini bertujuan memupuk semangat keusahawanan dan membina ketahanan diri dalam kalangan usahawan belia Bumiputera berusia 18 hingga 30 tahun bagi mengendalikan perniagaan mereka serta melahirkan lebih ramai pencipta pekerjaan (*job creator*) sekali gus menangani masalah kebolehpasaran dalam kalangan belia.

Menurut YB Datuk Ewon Benedick, “Sejak mula dilaksanakan pada tahun 2014, seramai 7,738 Alumni TUBE telah berjaya mewujudkan 13,866 peluang pekerjaan dan menjana nilai jualan terkumpul berjumlah RM154.38 juta hasil daripada perniagaan yang dijalankan. Di pihak Kementerian pula, seiring dengan keberhasilan (*outcome*) Program TUBE ini, KUSKOP terus komited dalam usaha memperkasakan ekosistem keusahawanan negara, sejajar dengan visi Dasar Keusahawanan Nasional 2030 (DKN 2030)”.

YBhg. Tan Sri Datuk Seri Panglima Bernard Giluk Dompok, Pengerusi SME Corp. Malaysia dalam ucapan aluannya pula berkata, “Program TUBE-X kembali diadakan secara bersemuka atau fizikal dengan beberapa penambahbaikan yang dilakukan dari segi pengubahan modul pembelajaran latihan asas keusahawanan serta lain-lain pengisian program agar ia lebih segar dan mengikut keadaan semasa serta nilai-nilai keusahawanan terkini”.

Sementara itu, YBrs. Encik Rizal bin Nainy, Ketua Pegawai Eksekutif SME Corp. Malaysia menyatakan, “Sebagai agensi yang bertanggungjawab dalam pembangunan PMKS di Malaysia, tumpuan akan turut diberikan dalam pembangunan usahawan belia Bumiputera. Kami mengharapkan dengan sokongan berterusan kepada Alumni TUBE, mereka dapat mengembangkan perniagaan mereka ke peringkat seterusnya demi meningkatkan sumbangan kepada ekonomi negara, terutamanya dalam pengwujudan peluang pekerjaan baharu dan meneroka pasaran eksport”.

Dalam majlis yang sama, YB Datuk Ewon Benedick turut menyampaikan sijil tamat kursus kepada peserta TUBE-X serta Anugerah Rancangan Perniagaan Terbaik dan

Peserta Terbaik selain menyaksikan Majlis Pertukaran Memorandum Perjanjian (MoA) antara SME Corp. Malaysia dan P2P Nusa Kapital Sdn. Bhd. MoA ini adalah bersempena pelancaran pembiayaan pinjaman alternatif di bawah *Bumiputera MSMEs Financing Initiative* (BMFI) bagi Program Peningkatan Enterpris Bumiputera (BEEP) yang menyediakan pembiayaan modal kerja sehingga RM200,000 dengan kadar keuntungan sehingga 3.5 peratus setahun.

Hadir sama semasa Sesi *Meet & Greet* TUBE-X dan Pelancaran BMFI@BEEP adalah YBhg. Dato' Sri Suriani binti Dato' Ahmad, Ketua Setiausaha KUSKOP dan YBhg. Tan Sri Datuk Seri Panglima Bernard Giluk Dompok, Pengerusi SME Corp. Malaysia.

– TAMAT –

Tentang SME Corp. Malaysia

SME Corp. Malaysia merupakan Agensi Penyelaras Pusat di bawah Kementerian Pembangunan Usahawan dan Koperasi (KUSKOP) yang berperanan sebagai pusat pengumpulan dan rujukan setempat bagi maklumat dan khidmat nasihat Perusahaan Mikro, Kecil dan Sederhana (PMKS). SME Corp. Malaysia juga menyelaras program pembangunan PMKS di Malaysia, menjalankan penilaian ekonomi dan pengakreditasi PMKS, serta melaksanakan program pembangunan perniagaan dan fasilitasi akses PMKS kepada pasaran dalam dan luar negara.

Bermula pada 2 Mei 1996, SME Corp. Malaysia dahulunya dikenali sebagai Perbadanan Pembangunan Industri Kecil dan Sederhana (SMIDEC), bermatlamat membangunkan Industri Kecil dan Sederhana (IKS) Malaysia yang berkeupayaan dan berdaya tahan agar mampu berdaya saing di pasaran global. Pada tahun 2007, SMIDEC telah diberi mandat oleh Majlis Pembangunan PKS Kebangsaan yang dipengerusikan oleh YAB Perdana Menteri untuk menggubal dasar dan strategi menyeluruh bagi PKS dan memacu program PKS merentasi Kementerian dan Agensi. Sehubungan itu, SMIDEC telah dijenamakan semula secara rasmi sebagai SME Corp. Malaysia pada 2 Oktober 2009.

PERBADANAN PERUSAHAAN KECIL DAN SEDERHANA MALAYSIA (SME CORP. MALAYSIA)

Aras 6, Blok B, Platinum Sentral
Jalan Stesen Sentral 2
Kuala Lumpur Sentral
50470 Kuala Lumpur
Tel : 603-9213 0077
Faks : 603-2775 6001
E-mel : info@smecorp.gov.my
Laman sesawang: www.smecorp.gov.my

Pengarah
Bahagian Komunikasi Korporat
(U.P. : Pn. Suraini Mohamad Sulaiman)
Tel : 03-2775 6290
E-mel : suraini@smecorp.gov.my